



BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
PREDSTAVNIČKI DOM

Broj:01-011-746/01

Sarajevo, 20. novembra 2001.

Z A P I S N I K

sa 16. sjednice Predstavničkog doma Parlamentarne skupštine Bosne i Hercegovine, održane 20. novembra 2001. godine

Šesnaesta sjednica počela je s radom u 15 sati. Prisustvovao je 41 poslanik. Odsustvo je opravdao poslanik Ljubomir Kovačević.

Pored poslanika sjednici su prisustvovali: Beriz Belkić, član Predsjedništva Bosne i Hercegovine, Zlatko Lagumdžija, predsjedavajući Savjeta ministara, Svetozar Mihajlović, Azra Hadiahmetović, Ante Domazet i Krešimir Zubak - ministri u Savjetu ministara, te Jadranko Prlić, Ivica Mišić, Vladislav Vladičić, Gordana Ković i Jusuf Halilagić - zamjenici ministara.

Iz međunarodnih organizacija sjednici su prisustvovali: Jan Petter Haltedahl – politički savjetnik u OHR-u, Marsoli Fraser – ispred OSCE-a, Mirsad Žiha ispred Američke Ambasade i Emina Ganić, ispred Savjeta Evrope

Predsjedavajući Predstavničkog doma Željko Mirjanić upoznao je poslanike u vezi s prijedlogom dnevnog reda i izmjenama koje su uslijedile nakon sazivanja sjednice, pa je za 16. sjednicu predložio dnevni red koji je usaglašen na sjednici Proširenog kolegija održanoj prije početka sjednice Doma.

O prijedlogu dnevnog reda nije bilo diskusije. Predsjedavajući je konstatovao da je za 16. sjednicu usvojen sljedeći

D N E V N I R E D

1. Usvajanje zapisnika sa 15. sjednice Predstavničkog doma,
2. Razmatranje pisma/izjave o spremnosti za preuzimanje odgovornosti za implementaciju svih uslova za prijem Bosne i Hercegovine u Savjet Evrope.
3. Poslanička pitanja i odgovori,
4. Izvještaj Komisije Kolegija o nastojanju za postizanje saglasnosti o Prijedlogu zakona o spoljnotrgovinskoj komori Bosne i Hercegovine,
5. Izvještaj zajedničke komisije o postizanju sporazuma o jedinstvenom tekstu zakona o izmjenama i dopunama Zakona o spoljnom dugu,
6. Prijedlog zakona o industrijskom vlasništvu (drugo čitanje),

7. Zahtjev Savjeta ministara za razmatranje po hitnom postupku (po čl. 104. Poslovnika) Prijedloga zakona o korištenju imovine koju je Bosna i Hercegovina dobila po Sporazumu o pitanjima sukcesije u Banci za međunarodna poravnanja u Baselu;
8. Prijedlog zakona o važnosti javnih isprava u Bosni i Hercegovini (prvo čitanje),
9. Davanje saglasnosti za ratifikaciju Ugovora o zajmu (Projekat rekonstrukcije željeznica) između Bosne i Hercegovine i Evropske banke za obnovu i razvoj.

Ad – 1: Usvajanje zapisnika sa 15. sjednice Predstavničkog dom

O Zapisniku nije bilo diskusije.

Sa 39 glasova ZA i jendim uzdržanim Dom je usvojio Zapisnik sa 15. sjednice.

Ad – 2: Razmatranje pisma/izjave o spremnosti za preuzimanje odgovornosti za implementaciju svih uslova za prijem Bosne i Hercegovine u Savjet Evrope

Predsjedavajući Mirjanić podsjetio je poslanike na izmjene Pisma koje su usllijedila na Političkom komitetu Savjeta Evrope, zbog čega je odgođena rasprava i usvajanje istog 8. novembra tekuće godine. Naglasio je da je u međuvremenu Pismo sa amandmanima razmatrano i podržano u Predsjedništvu Bosne i Hercegovine i Savjetu ministara. Potom je otvorio raspravu.

Zamjenik predsjedavajućeg Mariofil Ljubić u ime Koelgija predložio je da Dom u vezi s Pismom/izjavom usvoji Rezoluciju, čiji je sadržaj pročitao.

U diskusiji su učestvovali: Bogić Bogičević, Osman Brka, Željko Bilbija, Mustafa Cuplov, Marko Amidžić, Sead Buturović, Mirko Banjac, Miro Grabovac – Titan i Abdurahman Malkić.

Poslije diskusije predsjedavajući je na glasanje dao Prijedlog rezolucije.

Od 39 prisutnih u momentu glasanja, ZA je glasalo 38, a jedan poslanik je bio uzdržan. Prema tome, Predstavnički dom je usvojio sljedeću

REZOLUCIJU

Čvrsto opredijeljeni za prijem Bosne i Hercegovine u punopravno članstvo Savjeta Evrope Predstavnički dom Parlamentarne skupštine Bosne i Hercegovine izražava želju i spremnost za preuzimanje i implementaciju obaveza koje proizilaze za Bosnu i Hercegovinu iz dokumenata i stavova Savjeta Evrope, zasnovanih na poštivanju Ustava i zakona, vladavini prava i poštivanju ljudskih prava.

Predsjedavajući Mirjanić je konstatovao da je Dom usvajanjem Rezolucije omogućio predsjedavajućem Doma da potpiše Pismo/izjavu o spremnosti za preuzimanje odgovornosti za implementaciju svih uslova za prijem Bosne i Hercegovine u Savjet Evrope.

U nastavku sjednicom je predsjedavao prvi zamjenik predsjedavajućeg Mariofil Ljubić zbog obaveza predsjedavajućeg Mirjanića u vezi s potpisivanjem Izjave.

Ad – 3: Poslanička pitanja i odgovori

Poslanička pitanja postavili su poslanici:

Bahrija Osmanović:

Na koji način će biti regulisan problem penzionera u pogledu ostvarivanja zdravstvene zaštite, koji su ostvarili penzije u republikama bivše Jugoslavije ili državama koje su nastale? Da li je u planu sklapanje međudržavnih ugovora za regulisanje ovih pitanja i da li su ugovori sa nekim državama već sklopljeni?

Miro Grabovac – Titan:

Koliko je, po osnovu Sporazuma između SR Njemačke i BiH o detašmanu radnih obaveza za rad u SR Njemačkoj, dobijeno radnih dozvola od potpisivanja Dejtonskog sporazuma do 2000. godine, koliko ih je dobijeno u 2001. godini, kakva je bila njihova raspodjela po entitetima, ko je vršio raspodjelu, koliko su u Federaciji BiH dobili pripadnici hrvatskog, a koliko pripadnici bošnjačkog naroda, te ako postoji neko tijelo koje je pratilo strukturu na taj način zaposlenih ljudi, koliko je na taj način zaposleno do tada nezaposlenih demobilisanih boraca?

Miloš Jovanović:

Da li je istina da je Visoki predstavnik imenovao četiri člana Stalne izborne komisije koje je trebalo da imenuje Predstavnički dom. Ako je istina zbog čega je to urađeno i ima li odgovornosti za to?

Boro Bjelobrk:

Kolegiju Doma, a posebno predsjedavajućem, postavio pitanja:

«1. Kada ću dobiti odgovor postavljen 19. maja, u vezi informacije povodom Banje Luke i Trebinja i mjere Vlade Republike Srpske?

2. Na julskoj sjednici tražio sam da mi se stave na uvid dokumenti koje je povodom toga plasirao Predstavnički dom?

3. Šta je odgovornost Kolegija za primjenu ovog posla?»

Ad – 4: Izvještaj Komisije Kolegija o nastojanju za postizanje saglasnosti o Prijedlogu zakona o spoljnotrgovinskoj komori Bosne i Hercegovine

Zamjenik predsjedavajućeg Mariofil Ljubić je, u skladu s članom 65. tačka 3. Poslovnika Doma, obavijestio Dom da je Kolegij postigao saglasnost o Prijedlogu zakona o vanjskotrgovinskoj komori Bosne i Hercegovine i konstatovao da je Zakon ovim usvojen u Predstavničkom domu.

Ad – 5: Izvještaj zajedničke komisije o postizanju sporazuma o jedinstvenom tekstu zakona o izmjenama i dopunama Zakona o spoljnom dugu

Zamjenik predsjedavajućeg napomenuo je da su poslanici dobili Izvještaj zajedničke komisije sa obrazloženjem.

U vezi s Izvjetšajem nije bilo diskusije, pa se Dom o istom izjasnio.

Od 35 prisutnih ZA Izvještaj su glasala 33 poslanika, dva su bili uzdržani.

Zamjenik predsjedavajućeg je konstatovao da je usaglašen jedinstveni tekst Zakona o izmjenama i dopunama Zakona o spoljnom dugu, čime je Zakon usvojen u oba doma Parlamentarne skupštine.

Ad – 6: Prijedlog zakona o industrijskom vlasništvu (drugo čitanje)

Gospodin Ljubić je podsjetio poslanike na amandmane koji su podneseni na Prijedlog zakona i naglasio da se radi o poboljšanju teksta.

O amandmanima nije bilo diskusije.

Glasajući ponaosob o svakom Dom je usvojio amandmane od I do VI:

Amandman I – 35 ZA, dva uzdržana;

Amandman II – 35 ZA, jedan uzdržan;

Amandman III – 36 ZA, jedan uzdržan;

Amandman IV – 36 ZA, jedan uzdržan;

Amandman V – 36 ZA, 2 uzdržana;

Amandman VI – 33 ZA, 4 uzdržana.

Poslije glasanja o amandmanima Dom je usvojio Zakon o industrijskom vlasništvu u Bosni i Hercegovini. Zakon je usvojen jednoglasno – sa 38 prisutnih poslanika

Ad – 7: Zahtjev Savjeta ministara za razmatranje po hitnom postupku (po čl. 104.Poslovnika) Prijedloga zakona o korištenju imovine koju je Bosna i Hercegovina dobila po Sporazumu o pitanjima sukcesije u Banci za međunarodna poravnanja u Baselu

Predstavnički dom je jednoglasno usvojio zahtjev Savjeta ministara da se Prijedloga zakona o korištenju imovine koju je Bosna i Hercegovina dobila po Sporazumu o pitanjima sukcesije u Banci za međunarodna poravnanja u Baselu razmatra po hitnom postupku, u skladu s članom 104. Poslovnika Predstavničkog doma.

Ad – 8: Prijedlog zakona o važnosti javnih isprava u Bosni i Hercegovini (prvo čitanje)

O Prijedlogu zakona nije bilo diskusije.

Zamjenik predsjedavajućeg je konstatovao da je Dom, sa 34 od 38 prisutnih poslanika, podržao Prijedlog zakona o važnosti javnih isprava u prvom čitanju.

Ad – 9: Davanje saglasnosti za ratifikaciju Ugovora o zajmu (Projekat rekonstrukcije željeznica) između Bosne i Hercegovine i Evropske banke za obnovu i razvoj

Dom je jednoglasno dao saglasnost za ratifikaciju Ugovora o zajmu (Projekat rekonstrukcije željeznica) između Bosne i Hercegovine i Evropske banke za obnovu i razvoj.

Ovim je iscrpen dnevni red 16. sjednice.

Sjednica je s radom završila u 15,30 sati.

Sastavni dio ovog zapisnika je transkript 16. sjednice Predstavničkog doma.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
Dr Željko Mirjanić